

Lungzfiengz Lungzanh

□ Maj Veiyungz comz hoiz



▲ San gyaep lungz hong mbaeu gwn rengz.



▲ Gyoengq vunzlaux doxcomz san gyaep lungz.

◀ Lungzfiengz fouxdoengh vunz angqyangz.



▲ Roix cang duz lungzfiengz ndeu caen sairengz lai.

Cienznaeuz, Mingzciuz ndaw seiz Gyahging, gij dinfwngz cugguh lungz-foux Bouxcuengh Lungzanh youq dieg Bouxcuengh ndawde dwg ceiq ak, gij daiqbiuj de couh dwg lungzfiengz, guh dwk lumj duz caen nei. Lungzfiengz, daj gij coh de couh dwg ngeix daengz duz lungz aeu gij fiengz ndaw naz ma guh baenz haenx. Doiq gij vunz Lungzanh ma gangj, lungzfiengz youh saenzmaed youh doxndiep. Aenvih de mbouj dan lizsij naihnanz, lij biujyienh le gyoengqvunz siengjniemh ciuhgonq caeuq gyaepgouz gij ndwenngoengz vuenyungz haenx.

Gij dinfwngz guh Lungzfiengz saepsoiq dangqmaz, baumiz seiq bouhloh: Genj fiengz, san gyaep lungz, roix ndanglungz, guh gyaep lungz, yaek guh haujlai nanz, baengh gij goengrengz vunz lai cij ndaej guh baenz. Youq Lungzanh Yen Cwngz-siengh Cin Goz dai Segih miz aen dieggoek cienziep naz vwnzva ndeu, gizde miz aen doih cienmonz guh lungzfiengz ndeu, gungh miz cibhaj boux vunz. Guh duz lungzfiengz ndeu gyoengqde yaek aeu moix ngoenz guh cib diemj cung doxbae, guh baenz song ndwen lai seizgan yienghneix cij guh ndaej okdaeuq.

Cinz Saucangh dwg boux cangh-vehnda lungzfiengz, gij lungzfiengz ginggvaq fajfwngz de vehnda okdaeuq haenx miz cib lai duz, duzduz cung miz cien lai gaiq gyaep, gyaep lungz, rienglungz, cawlungz caiq gya caet hoh ndanglungz, itgungh miz cib hoh. "Aenvih gaiqgaiq aeu vunz ma guh, ndigah duzduz cung maqhuz naek. Duz ceiq naek ndeu aiq miz song bak lai gaen, duz ceiq raez ndeu miz ngeihcib haj mij, duz ceiq dinj hix miz seiq mij." Baeznaengz guh lungzfiengz, Cinz Saucangh cungj aeu caenndang baijhong, caemcaiq dawz baenz dauq dinfwngz san guh lungzfiengz son hawj gyoengqvunz, cungj

mbouj louz saek di. Yenzlaiz, gyoengqde feiqcawz gij cienziep sibgvenq rwix mbouj cienz vunzrog haenx, dawz gij dinfwngz guh Lungzfiengz yiedsim cienz hawj vunzrog, lij gungganq ok le buek vunzcaiz ndeu. Cingq lumj de naeuz, cijaeu bouxcoz nyienh naihsim hag, gij dinfwngz cienzdoengj guh lungzfiengz Lungzanh couh ndaej ciuh dem ciuh riuzcienz roengzbae.

Doenghbaez, aen gyaep lungz lungzfiengz yungzheih vaih, gij dajcang ndanglungz hix mbouj gaeuq ndei yawj. Ginggvaq mbouj duenh vehnda cauhoq, gij lungzfiengz seizneix dingz lai lumj gyaep lungz, ndoksaen lungz, rienglungz caeuq nyauj lungz daengj lij aeu fiengz ma san, youq gwnz giekdaj neix cij cungdenj gaijcaenh gyaep lungz. Gyaep lungz genj yungh duk cug guh aen gyaq ndeu, yienghneix baklungz aj ndaej gaeuq gvangq, yienzhaeuh yungh baumoz bieq ma deu guh heuhlungz, aeu suliu hoengz ma guh diuzlinx, mumh lungz hix yungh gij gangsei san ndei haenx ma guh, gij dalungz hix aeu gij caizliuh cienmonz haenx daeuq guh, daengz gyanghaemh lij ndaej doeng dien hawj de yaprongh, ndei yawj raixcaix.

Youq Lungzanh Yen, gvaq cieng, seiq nyied bet ciethongdawz, ngux nyied cibsam caeq saenzhaeuh daengj ciet hung cungj ndaej raen duz lungzfiengz. Daegbied dwg liggaueq ngux nyied cibsam caeq saenzhaeuh haenx, lungzfiengz engq dwg gij cawjgiek aen minzsug conzdungj hozdung neix. Ngoenz haenx, ranzranz hohhoh, bouxlaux lwgnyez cungj ok rog daeuq guhcaemz guh' angq, yawj foux lungz, mbaenjgouz bilaeng fwn raemx yinzrwd, saedceij yied daeuq yied hoengh. Gij lungzfiengz mbouj dan san ok gij naz vwnzva Bouxcuengh raeuz, vanzlij cienziep gij meijdwz gaenxguh ciuhgonq raeuz, gikleih bouxcoz gaenxguh baenzfouq.



▲ Lungzfiengz diemjda le yaprongh vifung.



▲ Cinz Saucangh langhbaij duz lungzfiengz de vehnda haenx.



▲ Lungzfiengz lumj caen vifung raeuh.



▲ Gyoengq vunzlaux langhbaij lungzfiengz ngamq guh baenz.



▲ Gyoengq cangh foux gaenx lienh foux lungzfiengz.